

Bida di cabritonan tin mas balor cu bida di hende pariba di brug

ORANJESTAD (AAN) Cuanto hende mas Pariba di brug mester muri pa falta di trato medico di urgencia prome cu gobierno di Aruba haci algo?

Cuanto famia mas mester keda atras den tristeza y desgracia pasobra nan ser keru a muri pa falta di ayudo medico di urgencia Pariba di Brug, prome cu nos politiconan haya un tiki sinti den nan curpa, pa dicidi cu algo mester worde haci cu urgencia grandi pa pone un Centro Medico real cu docternan 24 ora den servicio Pariba di brug?

Siman pasa atrobe un pacient cu a ser hiba cu urgencia pa Centro Medico, no por a haya ayudo di docter pasobra docter na warda no a presenta na Centro Medico y despues e pacient ta fayece riba caminda pa hospital!!

E asunto di Centro Medico Pariba di brug a sirbi tur partido politico bon pa nan a core campaña cune, pa asina nan haya voto riba sentimentonan di habitantenan Pariba di brug, pero despues di campaña tur a laga e pueblo di San Nicolas, bin te na brug di Balashi, cay manera un patia berde, blauw, geel, cora y tur otro color di partido cu a campaña pa gaña pueblo.

Mester menciona e palabra "gaña" pasobra na momento cu partidonan campaña fuertemente pa supuestamente duna e pueblo Pariba di brug un hospital sea grandi o chiquito, anto despues sea pa nan mesun ineficiencia pa goberna o pa motibo di boicot politico di otro partidonan den parlamento, te awe nan no por a percura pa Pariba di brug haya su hospital, anto pueblo no por saca otro conclusion cu ta gaña nan a gaña pueblo atrobe y nada otro!

E gañamento y e falta di respet a pasa tur norma di decencia y sinti di balornan humano pasobra ta bon bisto cu gobierno di Aruba y partidonan politico, no ta interesa den bienestar di e pueblo Pariba di brug debi cu e balor di bida di e ser humano cu ta biba Pariba di brug ta worde balota menos cu un parke nacional cu ta costa miyones.

E balor di bida di un ciudadano cu ta biba Pariba di brug ta menos cu cadushi, tuna, piedra y te hasta menos cu e cabritonan cu ta cana rond den Parke Arikok.

Pa gobierno Parke Arikok tin mas balor cu un hospital Pariba di brug pasobra na lugar cu AVP y OLA, y MEP tambe, a percura pa laga diferencianan y pleitonan politico para un banda, pa asina nan haci nan maximo esfuerzo pa duna Pariba di brug un hospital cu por duna servicio di ayudo medico di urgencia, nan a

haci lo contrario door di bringa otro incansablemente riba e asunto di hospital Pariba di brug.

Na lugar cu gobierno a percura pa sea amplia Centro Medico cu servicio di docter permanente o construi un hospital sea chiquito o grandi, nan a prefera di bay hinca miyones den un piscina olimpico cu riba su mes no tin nada contra dje, pero balor di e bida di e ser humano no por ser hala un banda pa duna preferencia na Parke Arikok, Piscina olimpico na Savaneta, Piscina na San Nicolas, construccion di rotonde vierkant y drecha e caminda principal pa drenta San Nicolas cu te awe pa colmo te ainda ta kibra.

Na lugar di hinca placa den mehora e servicio di Centro Medico y reserva placa pa pone docternan 24 ora pa dia den Centro Medico, gobierno di Aruba ta prefera di cumpra jeepnan caro pa Cowboyman di Parke Arikok core pariba bao den mondi, bao di e excusa cu nan mester e tipo di jeepnan caro cu nan tin actualmente pasobra si su mahestad La Reina bin di bishita Aruba, e no por bay core den un jeep comun pasobra e mester por sinta comodo.

Si su mahestad La Reina mester tende cu na Aruba gobierno

ta prefera di cumpra jeepnan caro pa core den mondi cune, na

lugar di hinca placa den cuido medico pa salba bida di hende Pariba di brug, anto mandatarionan por conta cu su mahestad La Reina no lo pone ni un pia den e jeepnan caro di Parke Arikok y e lo prefera di cana den solo pa bishita Parke Arikok, o e no lo bay parke Arikok mes.

No tin placa pa Centro Medico cu riba su mes no tin ningun hustificacion pa carga e nomber di Centro Medico pasobra no tin docter 24 ora pa dia na e centro medico aki y e ta mas bien un Centro Para Medico, caminda habitantenan di Pariba di brug mester resa na Dios pa nan bida ora cu nan ser hiba na e centro aki pasobra docter na warda ta sinta na cas y via telefoon e ta bisa broederman y verpleegster nan kico nan mester haci cu un pacient cu ta malo.

No tin placa pa cuido medico Pariba di brug, pero si tin placa pa ministronan viaha rond mundo hunto cu coordinadornan y gasta placa na monton pa bishitanan cu pueblo masha poco sa tende pa kico nan a ser haci.

No tin placa pa cuido medico Pariba di brug, pero si tin placa pa parlamentarionan tambe

viaha na grandi rond mundo pa bishita tur sorto di congreso, pa nan tambe por sinta papia cu parlamentarionan di otro pais y sinta delibera riba ideanan masha bunita y fantastico cu nunca sea ta worde realiza na Aruba o no por ser realiza mes.

No tin placa pa cuido medico pa habitantenan di Pariba di brug, pero si tin placa pa ministronan y parlamentarionan por bay den exterior pa haya cuido medico y tambe tin placa na grandi pa manda cierto compinchinan politico cu air ambulans pa bay cambia na Houston bateria di pacemaker di curazon cu por worde haci facilmente na Aruba mes.

No tin placa pa un hospital Pariba di brug, pero si tin placa pa renoba Sportpark na San Nicolas y construccion di un otro piscina tras di Sportpark.

No tin placa pa un hospital Pariba di brug, pero si tin placa pa ministronan yama mas cu 200 mil florin na celular, cumpra CD di bandanan di exterior, paga miyones na coordinadornan y otro compinchinan politico, huur V Car, One Cool Summer, World Youth Festival etc. etc. mientras cu Pariba di brug keto bay hende ta muri pa falta di cuido medico urgente.

Mandatarionan y politiconan no tin atencion pa bida di ciudadanonan Pariba di brug y esaki nan a demostra cu nan forma di goberna y e unico atencion cu nan tin pa habitantenan Pariba di brug, ta den tempo di eleccion y ora cu tin intiero.

Durante di intiero nan ta core

bay misa pa haci como si fuera cu nan ta comparti sentimento di dolor cu famia di fayecidonan, siendo cu ta nan mes a percura pa e situacion malisimo y manera Hudas nan ta bay condoler famia den pura, pa despues na careda sali di misa rumbo pa laba man o pa cas pasobra uzando intiero como capa, nan no mester sigui haci como si fuera e dia ey nan mester bolbe bay traha na interes di pueblo di Aruba; no shonnan, mandatarionan a bay intiero e dia ey y ta pesey nan no ta disponible mas pa pueblo!!

Pueblo di San Nicolas y Pariba di brug mester compronde un cos bon cla, cu si pa mas cu 40 aña caba gobiernonan a manipula cu intriga politico y politica partidista y no a haci mucho cos pa Pariba di brug y cu te hasta e barbuten ta haya un mihor servicio cu habitantenan di San Nicolas ta haya na Centro Medico, cu awor a bira tempo cu e pueblo aki no mester sigui acepta mas y exige di gobierno pa pone un hospital Pariba di brug.

Mientras cu e hospital Pariba di brug no bin, no mester acepta e Hudasnan na intiero y mester core cu nan den temporada di eleccion ora cu nan cana kibra cu nan saco di cement, zink, stoof, frigidaire etc etc cu nan kier cumpra hende cune pasobra nan a mustra bon cla, cu bida di cabritonan di parke Arikok tin mas balor cu bida di hende Pariba di brug.

Vale Hart, redactor di DIARIO.

CENTRO MEDICO GATEWAY TO HEAVEN!!

